

**Izveštaj sa Obuke edukatora – advokata u oblasti primjene standarda člana 10.
Evropske konvencije o ljudskim pravima
Neum, 17. i 18. maj 2018. godine**

Advokatska/Odvjetnička komora Federacije Bosne i Hercegovine, u saradnji sa Advokatskom komorom Republike Srpske, u okviru zajedničkog projekta Vijeća Evrope i Evropske unije, pod nazivom „Jačanje pravosudne ekspertize o slobodi izražavanja i medija u Jugoistočnoj Evropi – JUFREX“, dana 17. i 18. maja 2018. godine, u hotelu Grand u Neumu, organizovala je obuku za advokate iz FBiH i RS, pod nazivom „Jačanje kapaciteta advokata u slobodi izražavanja, Obuka za edukatore – advokate u oblasti primjene člana 10. Evropske konvencije o ljudskim pravima“.

Edukaciji je prisustvovalo ukupno 25 advokata iz cijele Bosne i Hercegovine, 14 iz Federacije BiH i 11 iz Republike Srpske, koji su aktivno učestvovali u diskusijama i studijama praktičnih primjera, kako bi se i praktično pokazalo na koji način se primjenjuju principi Evropskog suda za ljudska prava u domaćoj praksi.

Predavači na ovoj edukaciji su bili Ara Ghazaryan, međunarodni ekspert Vijeća Evrope, Amir Kapetanović, sudija Okružnog suda u Banjaluci, i Irena Puzić-Obradović, advokat iz Doboja, svi certifikovani treneri Vijeća Evrope za oblast člana 10. Evropske konvencije o ljudskih pravima.

Tokom edukacije, predavači su obradili više podtema, kao što su govor mržnje i zločin iz mržnje u kontekstu slobode izražavanja, razlika između iznošenja i prenošenja, sloboda izražavanja advokata, a obrađena je i HELP metodologija, tehnike i alati obuke, komunikacijske vještine te kako pripremiti studiju slučaja. Svako predavanje je bilo praćeno primjerima iz prakse Ustavnog suda Bosne i Hercegovine i Evropskog suda za ljudska prava, odnosno studijama slučaja.

Ovakav vid obuke advokata predstavlja izuzetno značajan korak ka unapređenju zaštite osnovnih ljudskih prava u Bosni i Hercegovini kao i promociji standarda primjene EKLJP posebno u smislu člana 10. Konvencije.

Sloboda izražavanja s jedne strane i ograničenja ove slobode s druge strane posebno su osjetljiva u sveukupnom društvenom kontekstu u Bosni i Hercegovini. Organizirana obuka za advokate čiji je profesionalni cilj i zadatak zaštita ljudskih prava i sloboda zasigurno je od pomoći svim kolegama koji postupaju posebno u predmetima po tužbama za klevetu, a koji su sve češće pred sudovima u Bosni i Hercegovini. Pored koristi za advokate koji su prisustvovali obuci i stekli nova znanja i vještine u ovoj oblasti, još je značajnije da će kao rezultat ove obuke u saradnji Advokatske/Odvjetničke komore FBiH i Vijeća Evrope, biti proširen krug advokata - edukatora koji će na osnovu stečenih znanja moći dalje vršiti edukaciju kolega - advokata i pripadnika pravne profesije iz drugih oblasti, te će na taj način biti omogućena kvalitetnija primjena standarda iz člana 10. Konvencije u praksi domaćih sudova, te prevenirani sporovi protiv Bosne i Hercegovine pred ESLJP zbog povrede prava iz ovog člana Konvencije.

Polaznici su po završetku edukacije dobili i certifikate kojim je potvrđeno da su pohađali ovu obuku iz oblasti čl. 10 Evropske konvencije o ljudskim pravima.